

03.07.2018/ISL

FCI-Ræktunarmarkmið nr: 289

ÍSLENSKUR FJÁRHUNDUR



UPPRUNI OG HEIMALAND: Ísland.

ÚTGÁFUDAGUR:- 15.06.2018

EIGINLEIKAR: Smalahundur.

FCI-FLOKKUN: Tegundahópur 5: Spísshundar og frumstæðar tegundir.
Flokkur 3: Norrænir vakt- og smalahundar.
Án vinnuprófs.

SAGA: Íslenski fjárhundurinn er þjóðarhundur Íslendinga. Hann er afkomandi hunda sem bárust til landsins þegar á landnámsöld. Hundurinn varð bændum ómissandi við smölun og yfirsetu og vinnueiginleikar hans hafa aðlagast landslagi, búskaparháttum og harðri lífsbaráttu Íslendinga á liðnum öldum.

HEILDARVIPUR: Íslenski fjárhundurinn er norrænn smalahundur, tæplega meðalstór og kröftugur, með upprétt eyru og hringað skott. Séð frá hlið mynda lengd og hæð hundsins rétthyrning. Mildur, greindarlegur og brosleitur svipur, öruggt og fjörlegt fas er einkennandi fyrir íslenska fjárhundinn. Hárafar er með tvennu móti, ýmist snöggt eða loðið. Báðar gerðir eru þéttar og mjög veðurþolnar. Kynjamunur er greinilegur á milli rakka og tíkar.

MIKILVÆG HLUTFÖLL: Séð frá hlið mynda útlínur rétthyrning, lengd hundsins frá bóglið að setbeini er meiri en hæð á herðakamb. Dýpt brjóstakassa er jöfn lengd framfóta. Trýni er ívið styttra en höfuðkúpa.

EIGINLEIKAR OG LUND: Íslenski fjárhundurinn er fimur, harðger og þolinn smalahundur sem gæltir og er því mjög gagnlegur við rekstur búsmala og til fjárleita. Vaktedli er hundinum eiginlegt og lætur hann vita þegar fólk ber að garði án þess að vera árásgjarn. Íslenski fjárhundurinn er glaður og vingjarnlegur, forvitinn, fjörmikill með ljúfa lund og óragur.

HÖFUÐ: Sterklegt og húð þéttliggjandi. Séð ofanfrá og frá hlið myndar höfuð þríhyrning.

KÚPUSVÆÐI:

Höfuðkúpa: Aðeins hvelfd.

Ennisbrún: Vel greinileg, en hvorki há né brött.

ANDLITSSVÆÐI:

Nef: Svart, dökkbrúnt á mórauðum og sumum leirhvítum hundum.

Trýni: Kröftugt og beint, ívið styttra en höfuðkúpa. Trýni mjókkar fram í snubbóttan þríhyrning bæði séð ofanfrá og á hlið.

Varir: Liggja þétt að kjálkum. Litarhaft er svart, dökkbrúnt á mórauðum og sumum leirhvítum hundum.

Kjálkar/Tennur: Skærabit og æskilegt að hundurinn sé fulltenntur.

Kinnar: Sléttar.

Augu: Möndlulaga og í meðallagi stór. Dökkbrún, en geta verið aðeins ljósari á mórauðum og sumum leirhvítum hundum. Hvarmalitur er svartur, dökkbrúnn á mórauðum og sumum leirhvítum hundum. Augnsvipur er mildur.

Eyru: Meðalstór og upprétt. Vel aðgreind án þess að vera lágt ásett. Nálgast jafnarma þríhyrning að lögun. Brúnir eru sléttar og stinnar en eyrnabroddar aðeins ávalir. Eyrun eru hreyfanleg og kvik og undirstrika athygli og hugarástand hundsins.

HÁLS: Í meðallagi langur og sterklegur, húð er þéttliggjandi. Hvelfdur við hnakka, nokkuð reistur og ber höfuð vel.

BOLUR: Sterklegur og í samræmi við byggingu hundsins og heildarsvip.

Bak: Beint, vöðvafyllt og sterkt.

Mjóhryggur: Breiður, vöðvafylltur og nokkuð stuttur.

Spjaldhryggur: Tiltölulega stuttur og breiður, hallar lítillega og vel vöðvafylltur.

Brjóstkassi: Langur, djúpur og vel hvelfdur.

Undirlína: Lítillega uppdregin.

SKOTT: Hátt ásett og hringast upp á bakið.

ÚTLIMIR:

FRAMHLUTI:

Heildarsvipur: Séð framan frá eru framfætur beinir, samsíða og sterkbyggðir. Liðbeygjur eru eðlilegar.

Herðar: Vel hallandi og vöðvafylltar.

Sporar: Mega vera tvöfaldir.

Loppur: Aðeins ílangar, tær eru hvelfdar og liggja þétt saman. Þófar eru stinnir.

AFTURHLUTI:

Heildarsvipur: Séð aftan frá eru afturfætur beinir, samsíða og sterkbyggðir.

Liðbeygjur eru eðlilegar.

Læri: Breið og vöðvafyllt.

Sporar: Sterklegir, tvöfaldir sporar (fjársporar), eru æskilegir.

Séu tvöfaldir sporar á fram- og afturfótum er hundurinn alspora.

Loppur: Aðeins ílangar, tær eru hvelfdar og liggja þétt saman. Þófar eru stinnir.

HREYFINGAR: Vasklegar, rúmar og spyrna afturfóta er kröftug. Yfirferð er drjúg og áreynslulaus.

FELDUR: Tvöfaldur, myndaður úr þeli og yfirhárum, þykkur og mjög veðurpolinn.

HÁRAFAR: Er með tvennu móti:

Snögg hárafar: Yfirhár eru frekar gróf en þelið þétt og mjúkt. Hár á trýni, kalli, eyrum og framan á fótum er sneggra, en lengra á hnakka, hálsi, herðakambi, bringu og aftan á lærum. Skott er þétthært og loðið og lengd skotthára í samræmi við hárafar hundsins.

Langt hárafar (lubbar): Yfirhár eru lengri og frekar gróf en þelið þétt og mjúkt. Hár á trýni, kalli, eyrum og framan á fótleggjum er sneggra, en mun lengra á hnakka, við eyru, á hálsi, herðakambi, bringu, aftan á framfótum (fanir) og aftan á lærum. Skott er þétthært, mjög loðið og lengd skotthára í samræmi við hárafar hundsins.

LITIR:

- Gulur og rauður í ýmsum blæbrigðum, allt frá ljósgrágulum eða ljósgulum lit til dökkrauðguls litar
- Leirhvítur
- Grár í ýmsum blæbrigðum
- Mórauður í ýmsum blæbrigðum
- Svartur

Hvítar merkingar fylgja alltaf aðallit. Mjög algengt er að aðalliturinn sé ljósari frá hálsi, undir kvið og aftur á skottenda (botnótt).

Kolóttur blær á trýni og jafnvel svört hár og hárendar (kolhært) fylgir gráum og oft gulum og rauðum feldlit.

Svörtum eða mórauðum feldlit fylgja oftast hefðbundnar gular eða grágular merkingar á kinnnum, yfir augum, undir skotti og á fótleggjum.

Flekkóttir hundar hafa misstóra ríkjandi flekki á líkama og geta auk þess haft aðrar hvítar merkingar.

Hvítar merkingar, eru oft óreglulegar, blesa (blesótt), önnur kinn eða helmingur höfuðs (skjömbótt), kragi (strútótt), á bringu, í kringum klær (sporótt), upp eftir löpp (löppótt), hátt upp eftir löpp (leistótt) og í skottenda (týra).
Litur er æskilegur á eða við eyru.

HÆÐ

<u>Æskileg hæð á herðakamb:</u>	Rakkar:	46 cm.
	Tíkur:	42 cm.

GALLAR: Öll frávik frá ofangreindri lýsingu eru gallar. Alvarleika þeirra ætti að meta eftir vægi og í réttu hlutfalli við hvaða áhrif þeir hafa á heilbrigði og líðan hundsins.

- Gegnheil svört eða mórauð kápa á gulum eða rauðum hundi
- Mjög ljós augu
- Kringlótt augu
- Algjört sporaleysi á afturfótum

ALVARLEGIR GALLAR:

- Blá augu
- Gul augu

ÓÁSÆTTANLEGIR GALLAR:

- Árásargjarnir eða mjög fælnir hundar
- Hundur með augljósa líkams- eða hegðunargalla fær einkunnina 0

ATHUGIÐ:

- Bæði eistu skulu vera af eðlilegri stærð og rétt staðsett í pungnum
- Einungis skal nota hunda til ræktunar sem eru heilbrigðir á sál og líkama og eru dæmigerðir fyrir kynið

